

3<sup>e</sup> fev<sup>r</sup> 1643 *ajouté*

# DECLARATION

DV ROY, *Case 9<sup>e</sup>*

Portant décharge de dix millions  
de liures sur les Tailles.

Ensemble la reuocation des taxes faites  
sur les Aysez & Marchands, pour raison de  
la décharge des Inuentaires pour le paye-  
ment du Droit de Subuention & autres  
Edicts; Le tout au soulagement de son  
Peuple. *Du 3. Juillet 1643.*

*Verifiée en Parlement le troiesme  
Septembre 1643.*



A PARIS;

Par IACQ. DUGAST, Imprimeur & Libraire  
ordinaire du Roy, au bout du pont Saint  
Michel, à l'Oliuier.

---

M DC. XLIII.

*Avec Prinilege de sa Majesté.*

Case

F

39

326

1643 fa

THE NEWBERRY  
LIBRARY



**L** OVIS PAR LA GRACE  
DE DIEV ROY DE  
FRANCE ET DE NA-  
VARRE, A tous ceux qui  
ces presentes Lettres verront, Salut.  
Le feu Roy nostre tres - honoré Sei-  
gneur & Pere (que Dieu absolue ) a  
esté obligé à tant de despenses extra-  
ordinaires, pour augmenter la gloire  
de cet Estat , secourir & maintenir  
ses Alliez, qu'il a esté contraint de se  
feruir de plusieurs moyens extraordi-  
naires qui luy ont esté proposez, pour  
soustenir l'honneur de ses Armes,  
dont Nous & nos Sujets devons à  
sa Memoire vne eternelle reconnois-  
sance. Mais le poids & diuersité de

A ij

ces moyens & leuées, a tellement sur-  
chargé nosdits Subjets, qu'ils, sont à  
la veille de succomber, s'il ne leur  
est donné quelque soulagement: C'est  
pourquoy apres auoir rendu à nostre-  
dit Seigneur & Pere les derniers de-  
uoirs, Nous & la Reyne Regente no-  
stre tres - honorée Dame & Mere,  
n'auons point de soing plus pressant  
que de décharger nosdits Subjets, au-  
tant que les affaires que nous auons  
sur les bras le peuuent permettre, de  
partie des Impositions & leuées ex-  
traordinaires qui se font, tant par les  
Commissions de nos Tailles, que par  
diuers autres moyens sur nos Subjets  
contribuables & autres, dont ils re-  
çoient plus de prejudice, que nous  
de secours, & dont les frais de l'exa-  
ction les surchargent d'auantage que  
ce qui nous en reuient. Pour paruenir  
à nostre dessein, Nous auons faict



voir à nostre Conseil les Edicts faits par nostredit Seigneur & Pere, qui s'execute encore, & le Breuet des Tailles des années dernieres : & de l'aduis de la Royne Regente nostre tres-honorée Dame & Mere, nostre tres-cher Oncle le Duc d'Orleans, nostre tres-cher Cousin le Prince de Condé, & autres Princes & Officiers de cette Couronne, & Principaux de nostre Conseil; N o u s auons dit, déclaré & ordonné, disons, declarons & ordonnons par ces presentes, signées de nostre main; Voulons & nous plaist, qu'en l'année prochaine mil six cens quarante quatre, nos Subjets contribuables aux Tailles, soient & demeurent deschargez, comme des à present nous les deschargeons, de la somme de dix millions de liures, sur le pied de ce qu'ils payent en la presente année, & dont le Breuet des

Tailles qui sera expedié pour l'année prochaine sera diminué, & ladite moderation regallée, ainsi qu'il sera iugé & aduisé en nostre Conseil: Comme aussi nous auons du mesme aduis que dessus, deschargé nosdits Sujets de ce qui reste à payer des taxes faites sur aucuns d'eux, comme Aysez & Principaux des Villes, Bourgs & Parroisses de nostre Royaume, pour jouyr de six cens mil liures de rente sur les Tailles, ordonnez estre distribuez aux plus Riches par Arrest du 22. Ianvier 1639. Ensemble des taxes qui ont esté signifiées à cause de la décharge des Inuentaires des marchandises qui estoient és Magazins & Boutiques lors de l'establissement de la Subuention du Vingtiesme: De celles de la la confirmation de l'exemption des Francs-fiefs, Et sur les Cabarettiers de Picardie, ordonnées par les Edicts,

Declarations & Arrests de nostre Conseil : Lesquels en ce qui reste à executer pour ce regard, Nous auons reuocé & reuocquons par ces presentes; Comme aussi nous auons reuocé, esteint & supprimé la Chambre de Iustice, cy-deuant establie à l'Arsenal, Renuoyans tous les procez qui s'y trouueront meus & pendans par-deuant les Iuges ordinaires qui en doiuent cognoistre. Et en attendant que nous soyons pleinement informez des taxes faites pour le droict de Francs-fiefs, Confirmation de l'Heredité, & de l'engagement des Domaines, dont le recouurement se fait en vertu des Edicts du feu Roy nostre tres-honoré Seigneur & Pere: Nous auons surcis le payement de ce qui reste à exiger desdites taxes; Faisant defences aux Porteurs de Quittances d'icelles, d'yser d'aucunes contraintes

pour raison de ce, jusques à ce qu'autrement en ait esté par nous ordonné, à peine de concussion. NOUS souhaitterions tres volontiers durant nostre Regne & la Regence de nostre tres-honorée Dame & Mere, pouuoir donner à nos Peuples vn entier soulagement : Mais la gloire de cet Estat ne le pouuant permettre, sans voir perir en nos mains tant d'auantages que cette Courōne a eus depuis quelques années, qui ont releué sa reputation par dessus toutes les autres de l'Europe : A quoy tout ce Royaume a tant d'interest, que nous cſperons de nos bons Subjets, que considerant cet interest commun, ils souffriront encore pour quelque temps les autres leuées, dont nous ne pouuons les descharger : Et que nous sommes necessitez par leur propre consideration de laisser, contre nostre desir, ne pouuant  
quand



quand à present leur donner vn plus  
 grand soulagement. SI DONNONS  
 EN MANDEMENT à nos amez &  
 feaux Conseillers, les Gens tenans  
 nostre Cour de Parlement à Paris,  
 Que ces presentes ils fassent lire, pu-  
 blier & enregistrer, & le contenu en  
 icelles, garder & obseruer, selon leur  
 forme & teneur, sans souffrir qu'il y  
 soit contreuenue, Nonobstant tous  
 Edicts, Declarations, Ordonnances,  
 Reglemens & Arrests quelconques à  
 ce contraires; ausquels & aux déro-  
 gatoires des déroatoires y contenus,  
 Nous auons derogé & derogeons par  
 ces presentes. Et d'autant que d'icel-  
 les l'on pourra auoir besoin en diuers  
 lieux, Voulons qu'aux coppies deuë-  
 ment collationnées par l'vn de nos  
 amez & feaux Conseillers & Secre-  
 taires, foy soit adjoustée comme à l'o-  
 riginal: Car tel est nostre plaisir.

En tesmoin dequoy , Nous auons à  
cesdites presentes fait mettre nostre  
Seel. **D O N N E'** à Paris le 3. iour de  
Iuillet, l'an de grace mil six cens qua-  
rante-trois. Et de nostre regne le  
premier. Signé , **LOVIS.**  
*Et plus bas*, Par le Roy , la Reyne  
Regente sa Mere presente , **D E**  
**G V E N E G A V D.**

Registrées, Ouy le Procureur General  
du Roy, pour estre executées selon leur for-  
me & teneur, & coppies collationnées d'i-  
celles enuoyées aux Bailliages & Senes-  
chaussées de ce Ressort, Pour y estre leuës,  
publiées, registrées & executées à la dili-  
gence des Substituts dudit Procureur Ge-  
neral, Ausquels enjoint d'y tenir la main,  
& en certifier la Cour auoir ce fait au  
mois. A Paris en Parlement le 3. iour de  
Septembre mil six cens quarante-trois.  
Signé, **D V TILLET.**

---

EXTRAICT DES REGISTRES  
du Parlement.



EV PAR LA COVR  
les Grand' Chambre ,  
Tournelle & de l'Edict  
assemblées les Lettres Pa-

tes en forme de Declaration, don-  
nées à Paris le 3. Iuillet 1643. Signées,  
LOVIS, Et plus bas, Par le Roy, la  
Reyne Regente sa mere presente, DE  
GVENEGA VD: Et seellées du grand  
seau de cire jaune: Par lesquelles ledit  
Seigneur auroit Declaré & Ordonné,  
veut & luy plaist, qu'en l'année pro-  
chaine mil six cens quarante-quatre  
ses Subjets contribuables aux Tailles,  
soient & demeurent deschargez de la  
somme de dix millions de liures, sur

le pied de ce qu'ils payent en la presente année , & dont le Breuet des Tailles qui sera expedié pour l'année prochaine, sera diminué, & ladite moderation regalée , ainsi qu'il sera iugé & aduisé à son Conseil, comme aussi auroit deschargé feldits Subiets de ce qui reste à payer des Taxes faites sur aucuns d'eux, comme Aysez & Principaux des Villes, Bourgs & Parroisses de son Royaume , pour iouyr de six cens mil liures de rentes sur les Tailles, ordonnés estre distribués aux plus Riches par Arrest du vingt-deux Ianuier mil six cens trente neuf ; Ensemble des Taxes qui ont esté signifiées à cause de la décharge des Inuentaires des Marchandises qui estoient és Magazins & Boutiques lors de l'establissement de la Subuention du Vingtième, de celles de la confirmation de



l'exemption des Francs-fiefs, Et sur les Cabarettiers de Picardie, ordonnées par les Edicts, Declarations & Arrests du Conseil : Lesquels en ce qui reste à excuter pour ce regard, ledit Seigneur auroit reuocqué par sesdites Lettres; Comme aussi ledit Seigneur auroit reuocqué & supprimé la Chambre de Justice, cy-deuant establie à l'Arsenal; Et renuoyé tous les procez qui s'y trouueroient meus & pendans pardeuant les Iuges ordinaires qui en doiuent cognoistre, & en attendant qu'il soit plainement informé des taxes faites pour le Droiët de Francs-fiefs, confirmation de l'heredité & de l'engagement des Domaines, dont le recouurement se fait en vertu des Edicts du feu Roy, son tres-honoré Seigneur & Pere : Il auroit surcis le payement de ce qui reste à exiger desdites taxes;

Faisant defences aux Porteurs de quit-  
tances d'icelles, d'yfer d'aucunes con-  
traintes, pour raison de ce, iusqu'à ce  
qu'autrement en ait esté par luy ordō-  
né, à peine de concussion, ainsi & com-  
me plus au long le cōtiennent lesdites  
Lettres & Declaration: Conclusions  
du Procureur General du Roy, La  
matiere mise en deliberation, LA  
COUR a Ordonné & ordonne que  
lesdites Lettres seront Registrées au  
Greffe d'icelle, pour estre executées  
selon leur forme & teneur: Et que  
copies collationnées d'icelles seront  
enuoyées aux Bailliages & Seneschau-  
sées de ce Ressort, pour y estre leuës,  
publiées, registrées & executées à la  
diligences des Substituts du Procu-  
reur General du Roy, auxquels en-  
jointz d'y tenir la main, & d'en cer-  
tifier ladite Cour, auoir ce fait au

mois. FAIT en Parlement le troi-  
siesme Septembre mil six cens qua-  
rante-trois.

Signé, DV TILLET.

*Collationné aux Originaux par moy  
Conseiller, Secretaire du Roy &  
de ses Finances.*

THE  
LIBRARY OF THE  
MUSEUM OF NATURAL HISTORY  
NEW YORK

NO. 1000

THE  
LIBRARY OF THE  
MUSEUM OF NATURAL HISTORY  
NEW YORK